

Молчастығ наклонение

Молчастығ наклонениенің формазы, прай даа тюрк тілдерінде иділістің төстігіне алай өөніне **-са/-се, -за/-зе** хозым хозылып, пүтче.

Молчастығ наклонениенің олаңай формазының сырайча хубулызы

Молчастығ наклонениедегі иділіс сырайча толдыра нимес (хысха) сырай хозымнары ползыиінаң хубулчалар.

Итірчеткен форма

Пір санда

1 с. пас-са-м	ал-за-м	ит-се-м	сине-зе-м
2 с. пас-са-ң	ал-за-ң	ит-се-ң	сине-зе-ң
3 с. пас-са	ал-за	ит-се	сине-зе

Көп санда

1 с. пас-са-быс	ал-за-быс	ит-се-біс	сине-зе-біс
2 с. пас-сар	ал-за-ңар	ит-сер	сине-зе-ңер
3 с. пас-са-лар	ал-за-лар	ит-се-лер	сине-зе-лер

Молчастығ наклонениенің итірбинчеткен формазы иділістің төстігіне алай өөніне **-ба/-бе, -па/-пе, -ма/-ме** хозым хозылып пүтче.

Пір санда

1 с. пас-па-за-м	сине-бе-зе-м	сом-ма-за-м
2 с. пас-па-за-ң	сине-бе-зе-ң	сом-ма-за-ң
3 с. пас-па-за	сине-бе-зе	сом-ма-за

Көп санда

1 с. пас-па-за-быс	сине-бе-зе-біс	сом-ма-за-быс
2 с. пас-па-зар	сине-бе-зер	сом-ма-зар
3 с. пас-па-за-лар	сине-бе-зе-лер	сом-ма-за-лар

Сизіндірігі. Көп сандағы 2-чі сырай **-сар/-сер, -зар/-зер** хозым пурунғы тілдегі үс хозым пірік парған сылтаанда пүт парған: -за (молчастығ наклонение) + ң (2-чі сырай), + (-)ар (көп сан хозымы):

-за+ң+лар (*парзаңлар*) >

-за+ң+ар (*парзаңар*) >

-заар (*парзаар*).

Че амғы орфография хоостыра **-заар/-зеер** хозымдағы узун гласнай пір ле букванаң таныхталча.

Амғы туста пу үс варианттаң **-заңар** паза **-заар** ла варианттар киректелчелер. «*Атсаңар*», «*көрзеңер*» вариант өөнінде хаастарның на чооғында киректелче. Хакастарның көбізі, тізең, *атсаар, көрзеер, нанчатсаар* вариантнаң тузаланчалар.

Молчастығ наклонение формазының тузалары

Олаңай форманың өөн тузазы

Молчастығ наклонениенің олаңай формазында турчатхан иділістен пілдіріл парған действиенің иртірілерінең алай иртірілбезінең теелістіг (зависеть) полча пасха действиенің (аны өөн действие тіп адап саларбыс) иртірілері алай иртірілбезі.

Молчас паза өөн действиелерні таныхтапчатхан иділістернің итірчеткен алай итірбинчеткен формада турчатханнарына көре, оларның аразында төрт пасха молчастығ тееліс таныхтап саларға чарир:

а) молчас паза өөн действиелерні таныхтапчатхан иділістер ікізінең итірчеткен формада ползалар, молчас действие иртірілзе, өөн действие иртірілерөк: *Наңмыр тузында чагза, тамах чахсы сығар;*

б) молчас паза өөн действиелерні таныхтапчатхан иділістер ікізінең итірбинчеткен формада ползалар, молчас полчатхан действие иртірілбезе, өөн действие иртірілбезөк: *Наңмыр тузында чагбаза, тамах чахсы сыхпас;*

в) молчас полчатхан действие иртірілзе, өөн действие иртірілбес: *Таңда*

наңмыр чагза, *піс от тырбирга парбасныс*;

г) молчас полчатхан действие иртірілбезе, өөн действие иртірілер:
Таңда наңмыр чагбаза, піс от тырбирга парарбыс.

Молчас обороттығ (чоох кизектіг) оланай чоохтағда молчас паза өөн действиелерні пір субъект иртірче: *Пабам, тоғыстаң ирте килзе, мині велосипеднең чөрерге үгредер. (Пабам килзе, пабам үгредер).*

Че молчас хоза (придаточнай) чоохтағлығ хадыл чоохтағларда молчас паза өөн действиелер ікі пасха субъект иртірче: *Мин школадаң ирте килзем, пабам мині велосипеднең чөрерге үгредер (Мин килзем, пабам үгредер).*

Молчастығ наклонениенің формазы пірееде молчастығ нимес тузалығ киректелче. Көзідімнер:

1) Молчастығ форма молчастығ действиені таныхтабин, өөн действиенен пір туста иртчеткен сын (реальной) действиені таныхтапча: *Туразар кірзе, пір дее кізі чоғыл (чоохтаң). (Кірбеен дее полза, кізі чох поларчых). Бригададаң айланзам, иб істі чылығ, суг-нине тазыл парған (С.Ч.). Түрчеден көрзең, сімерткі синезіп, күс сыназып, күрес парған поладырлар (К.Н.). Иссем, миннеңер чоохтасчалар (чоохтаң)*

2) Сурынысты таныхтабохча: *Анаң огородтаң пірее сыра суурып алзаң, апсах... (М.О.).*

Пірееде сурынысты тыытча: *Килзеңа табырах. Нога анда турчазың? Кірзең туразар.*

Молчастығ наклонениенің формазы паза кизегестер

Молчастығ наклонениенің формазы кизегестернең хада киректелчетсе, ағаа (формаа) кизегестің тузазы хозылча:

1) тыыдыс кизегестен хада полза, молчас действие иртірілзе дее алай иртірілбезе дее, өөн действие ағаа тың хайбинча: *Чыылығ тоозыл таа парған полза, кізілер тараспинчатханнар. Аннаңар чиит ипчинің өкпе-чүреен улуг чобаг өтіре сытатчатса даа, сыытха ол кірбеен (В. Там.).*

Постарына адалып пирилбеен дее полза, атты пыласханнар (Н. Тин.).

2) **-ох/-өк** чөпсінис кизегеснең хада молчастығ форманаң пілдіріл парған действие тоозылзох, өөн действие пасталча: *Больницадаң сыхсамох, Абаканзар парарбыс, палаларым (Г. Топ.). Пу сынны ассабызох, станция көрінібізер (С.Ч.). Пірее кізі ізік тохлатсох, палалар прайзы ізікзер ойласчалар.*

3) **ла/ле, на/не** пөліс кизегеснең хада молчастығ форманаң пілдіріл парған действие иртіріл парза ла, өөн действие пасталча алай ба тохтадылча: *Тоғыс, пазох арчы түзібіссе ле, тоозылча (К.Н.). Маймааңны, суға читсең не, суур. Аңчылар, наа хар чаап парза ла, аңнап пастапчалар (чоохтаң). Сузгар таспаза ла, пүктердегі хыраларда тамах түзімніг сыгар (газ.).*

4) **Чи** кизегеснең хада молчастығ формадағы иділіснен пілдіріл парған действие **даа/дее** кизегеснең өк чіли, өөн действиее ідөк көні теелбинче, ол агаа пірееде тоғыр турғызылча: *Нанза чи (ол), піс тоғыста халарбыс.* (Ол саңай даа нанзын, піске пасказы чоғыл. Тиңнестіріңер: *Ол нанза даа, піс тоғыста халарбыс).* *Тізелер чи, алай мини поларға хынминчазың ма? (И.К.). Пу чазыма читіре сағын чөрчем, а ол школа полбаан полза чи, ыраххы чирзер хайди парып аларчыхпыс* (газетадаң).

Хай пірее иділістер молчастығ наклонениенің формазында кирілген алай пользығылығ сөс польп киректелчелер. Алып алааңар **итсе, хынза, арса** паза **тізең** сөстерні: *Итсе-де, ол аар тоғыс,-улуғ тынча ол.-Хынзаң, хада тоғынааң (И. Топ.). (Итсе-де – кирілген сөс).* *Итсе-де, Лыковтарның пасхаңыл күзінеңер көп чоохтар чөрче (В. Тат.). Итсе-де, минің андаг нимелер удаа пол парчатхан (И. Топ.). Позы ол ипчліг, итсе-де (И. Топ.).* *Иди полза, пуларға сагамох тизерге кирек, итпезе, оңнаг полбас (Н.Д.). (Итпезе - кирілген сөс).* *Хынза, пүүн наңмыр даа чаабызарға айабас (чоохтаң).* *Хынза, пайзаң иб турғыс салам, Пос посха пілігчі төріп парып (С. Том).* (**Хынза** – кирілген сөс).

Ті иділіснен молчастығ наклонение формазы **тізең**, өөн тузазынаң пасха,

тоғырлас союз полып киректелче: *Алындағы күн, тізең, тағдаң ахчатхан наңмырлығ сугны чурттаң хыйа ағысчаң кооп хасхабыс...* (В. Тат.). *Харындастар хутухсар чүгүргеннер, Ванюшка, тізең, олардаң пуруннаан* (нымахтаң).

Арса сөс, ідөк **ар** («аңгмак») иділістің молчас формаына төөй: ол амғы тілде кирілген сөс чіли киректеліп, хайдағ-да нимені, сағысты пасха ондайнан паалирға чарапчатхан (*tahmin*) модальностьты таныхтапча: *Ачисовтарның аалдаң парғаннарын, арса, чох-чоос туған-чағыннары ла пілгеннер* (Б.Б.). *Пу чирде чил хомзынганым Хуюннаң чөрче, арса* (С. Том)

Молчастығ наклонениенің тус формалары

Молчастығ наклонениенің олаңай формалары өөн действиенең теелізіп, көбізін логика хоостыра полар туссар көстелчеткен молчас действиені таныхтапча: *Нанчымнаң тоғассам, Москвазар чорығымнаңар чоохтап нирербін – Bir arkadaşım la buluşsam Moskova ya yolculuktan bahsedeceğim.*

Молчас наклонениенің поэнының полчатхан, ирткен, полар тус формалары пар. Олар прайзы хадыл ондайнаң пүтчелер:

- молчас действиені таныхтапчатхан иділіс полчатхан, ирткен алай ба полар тус причастие формаында турғызылча,

- молчастығ наклонениенің паза сырай хозымнары поэзығлығ **пол** иділіске хозылчалар:

Пір сан

полчатхан тус	ирткен тус	полар тус
<i>пасчатхан пол-за-м</i>	<i>пасхан пол-за-м</i>	<i>пазар пол-за-м</i>
<i>пасчатхан пол-заң</i>	<i>пасхан пол-за-ң</i>	<i>пазар пол-за-ң</i>
<i>пасчатхан пол-за</i>	<i>пасхан пол-за</i>	<i>пазар пол-за</i>

Көп сан

<i>пасчатхан ползабыс</i>	<i>пасхан пол-за-быс</i>	<i>пазар пол-за-быс</i>
<i>пасчатхан ползаар</i>	<i>пасхан пол-заар</i>	<i>пазар пол-заар</i>
<i>пасчатхан ползалар</i>	<i>пасхан пол-залар</i>	<i>пазар пол-залар</i>

Молчастығ наклонениенің хадыл тус формалары итірбинчекен формалығ причастиелер паза **пол+за** +сырай хозымы ползыиінаң пүтчелер:

полчатхан тус хозымнары: **-бин, -пин, мин.**

*пас**пин**чатхан ползам*

паспинчатхан ползаң

паспинчатхан полза

паспинчатхан ползабыс

паспинчатхан ползаар

паспинчатхан ползалар

ирткен тус хозымнары: **-ба/-бе, -па/-пе, -ма/-ме**

*пас**па**ан пол-за-м*

полар тус хозымнары: **-пас/-пес, -бас/-бес, -мас/-мес**

*пас**пас** ползам*

паспас ползаң

паспас полза

паспас ползабыс

паспас ползар

паспас ползалар

Полчатхан тус формазының, хадыл формадаң пасха, аффикс ползыиінаң пүтчеткен олаңай формазы пар:

Пір сан

пасчат-са-м

пасчат-са-ң

пасчат-са

Көп сан

пасчат-са-быс

пасчат-сар

пасчат-са-лар

Итірбинчеткен формады (-бин/-пин/-мин)

Пір сан

пас-пин-чат-са-м

пас-пин-чат-са-ң

пас-пин-чат-са

Көп сан

пас-пин-чат-са-быс

пас-пин-чат-сар

пас-пин-чат-са-лар

Литература тілінең көзідімнер: *Чырт мині, Хапың хончы, холың хычыпчатхан полза*, - сизік алып, настаан апсах, - амгы үлгүде андағ кибір чоғыл тіп искем (Н.Доможаков).

Палых хаппинчатса, апсах андох ла одыра сабыхсыбысчатхан (И.Костяков).

Ансамбль узы пүүн дее уйан нимес, че чахсы **полған полза**, ноо даа сценада позын пөзік синде көзідерчік (газетадаң). Мин синің киректерің **пілбеен ползам**, сағам чагын даа чухпасчыхпын (Н.Доможаков). Одың **чүктенер ползаң**, парарбыс (М.Туран). Магаа парарзың ма, Хызирке? **Парбас ползаң**, позытпаспын (М.Туран).

Молчастығ наклонениенің пасха-пасха тузалығ хадыл формалары, үстүнде көзіділген причастиелердең пасха, причастиелер полызиинан пүдібөкчелер:

а) *пасчаң*

б) *пасхалах*

пол-за-м, пол-за-ң, пол-за

в) *пасхадағ*

пасчаң полза

пасхалах полза

пасхадаг полза

Идер тоғыстар

1. Иділістерні молчастығ наклонениеде турғызыңар, сырай пастыра хубулдырыңар.

Сом -	хаза -	кӱгле -
хайралла -	ойна -	ал -
піл -	тӱле -	чі -

2. Молчастығ наклонениедегі иділістерні табыңар.

Часкалығ кізі ачых-чарых, чоохчыл. Андағ кізілерні көр салзам, аның үчүн ідӱк ӱрinerім килче. Че полғаны ла аннаңар пілбинче. Туған-чағыннар хазых ползалар — ол улуғ часка. ӱлӱкӱннер сӱбiренeң пайрамназа — ол часка, хыныс килзе — ідӱк улуғ часка. (ХЧ)

3. Молчастығ наклонениедегі иділістерні, таап, сиип салыңар. Чоохтағларның грамматика ӱӱннерін кӱзiдiңер.

1) Ис кӱрзебіс, постарынаңар даа чоохтабин, пістеңер чоохтапчатхан осхастар. (А. Кузугашев) 2) Иди пістің отряд чарадыбысхан: кем нанарға хынза, нанзын, кем партизаннарға кірерге итсе, кірзін. (А. Кузугашев) 3) Иртен усхун килзең, кӱн сырайға теепче. Усхун парзаң, аннаң андар узирың даа килбинче. («Хакас чирі» газетадаң) 4) Часхы наа ла пасталыбысса, чир-чайаан ах кип-азаан суурыбысча. («Хакас чирі» газетадаң) 5) Парчых палалары ӱс парзалар, іче-пабалары оларны учуғарға ӱгретчелер. 6) Палалары чахсы учух сыхса, парчыхтарның сӱбiрелері хыраларзар учуғыбысчалар.

4. Сӱспектерні хығырыңар, пазып алыңар, молчастығ наклонениедегі иділістерні табыңар.

1) Улуғның чооғын иссең, узада күнни көрерзің. 2) Чөбі чох чуртазаң, хысха чуртас полар. 3) Чөптіг чуртазаң, узун чуртас полар. 4) Арғаас ползаң — ахсың хатар. 5) Таға сыхсаң, тайағың полам; суға кірзең, чөлеең полам.

Литература

1. Боргояков В.А., Медведева М.А., Кызласова И.Л., Чебодаева Л.А. Хакас тілі. Морфология (Пос алынча чоох чардыхтары): үгредіг пособиезі/ В. А. Боргояков, М. А. Медведева и др. – Ағбан: Н. Ф. Катановтың адынаң хакас хазна университетінің издательствозы, 2018.
2. Карпов, В.Г. К проблеме о частях речи в хакасском языке [Текст] / В.Г. Карпов // Ежегодник Института саяно-алтайской тюркологии. Вып. V. – Абакан: Издательство Хакасского государственного университета им. Н.Ф. Катанова, 2000. – С 15-24.
3. Севортян, Э.В. К проблеме частей речи в тюркских языках [Текст] / Э.В. Севортян // Вопросы грамматического строя. М.: АН СССР, 1955. – С. 210-213.
4. Хакас тілі. Морфология [Текст] 021700.02 Филология (Хакас тілі паза литература) специальностьча үгренчеткен студенттерге үгредіг пособие / филнд Карповтың В.Г. редакциязынаң – Ағбан: Н.Ф. Катановтың адынаң Хакас хазна университетінің издательствозы, 2004. – С. 55-60.
5. Чебодаева Л.И. Хакас тілінің практикумы. 050302 — Хакас тілі паза литература специальностьча үгренчеткен студенттерге үгредіг пособие / Л. И. Чебодаева, А. Н. Чугунекова, М. Л. Тахтаракова; филнк. Л.И. Чебодаеваның редакциязынаң. - Ағбан: Н.Ф. Катановтың адынаң хакас хазна университетінің изд-возы, 2009. - 149 с.